

## Cunghjucazione

### Ciculu 3 (CE2) U passatu cumpostu

**Ogettivu :** - Cunnosce u funziunamentu di a lingua  
- Sapè custruisce u passatu cumpostu di i verbii in « à » ( custruzione cù l' ausiliariu « avè »)

#### **Sbucinera :**

**Prima tappa** : Travagliu à bocca

U maestru ripiglia u filu di u racontu. Ripiglia l'azione aduprendu u passatu cumpostu ind'è e so dumande :

- Ch'anu fattu i funghi in a chjarina ? → I funghi anu urganizatu una riunione in a chjarina.
- Ch'anu prupostu e ghjire ? → E ghjire anu prupostu d'andà à truvà a signora di a furesta.
- Ch'hà fattu a signora di a furesta ? → A signora di a furesta hà dumandatu à Taviu di risparmià i funghi.
- Ch'hà fattu tandu Taviu ? → Taviu hà cuntinuatatu à coglie i funghi.
- Chì li hè accadutu à Taviu → Taviu hà manghjatu una frittata tamanta è hà avutu a pena in corpu.
- À quale Taviu hà chjamatu à u succorsu ? → Taviu hà chjamatu à u succorsu a Signora di a furesta.
- Ch'hà fattu a Signora di a furesta ? → A Signora di a furesta hà fattu prumette à Taviu d'ùn stirpà più i funghi è hà preparatu una tisana per guariscelu.

**Seconda tappa** : A regula di custruzione di u passatu cumpostu  
U maestru hà scrittu à u tavulone e frase :

*A signora di a furesta hà dumandatu à Taviu di risparmià i funghi.*

*Taviu hà cuntinuatatu à coglie i funghi.*

*Taviu hà manghjatu una frittata tamanta.*

*A signora di a furesta hà preparatu una tisana d'erbigliule.*

U maestru dumanda à i zitelli di truvà a forma verbale in ogni frasa è a face inturnià.  
Dopu, u maestru piglia in contu a prima frasa è face varià u sugettu rimpiazzendulu da « eiu », « Paulu è Maria », « tù », « voi », « noi » ...

S'ottenenu e frase :

- Eiu aghju dumandatu ...
- Paulu è Maria anu dumandatu ...
- Tù ai dumandatu ...
- Voi avete dumandatu ...
- Noi avemu dumandatu ...

Si face dî à i zitelli a regula di custruzione di u passatu cumpostu. Vale à dî : **U verbiu avè à u prisente seguitatu da u participiu passatu di u verbiu sceltu.**

U maestru dumanda à un zitellu di scrive a cunghjucazione di u verbiu « cantà » à u passatu cumpostu è à un antru quellu di u verbiu « parlà »

Aghju cantatu  
Ai cantatu  
Hà cantatu  
Avenu cantatu  
Avete cantatu  
Anu cantatu

Aghju parlatu  
Ai parlatu  
Hà parlatu  
Avenu parlatu  
Avete parlatu  
Anu parlatu

E cunghjucazione seranu cupiate nant' à u quaternu.

### **Terza tappa : Eserciziu strutturale cullettivu**

Prupone à i zitelli di truvà a forma verbale ghjusta.

U maestru dà u verbiu à l'infinitivu è a persona. I zitelli pruponenu a risposta bona chì serà scritta nant' à a tavulella , po curretta à u tavulone.

U maestru prupone :

Cantà / 3a pers. Plurale  
Ghjucà / 2a pers . Sing.  
Marchjà / 1a pers. Plur.  
Ballà / 1a pers.Plur.  
Cuntà / 3a pers. Sing.  
Guardà / 2a pers. Plur  
Manghjà / 1a pers. Sing  
Saltà / 3a pers. Plur

Travagliu individuale :

*(Da vede fiscia di u scularu)*

Ind'è una seconda seanza serà studiatu u passatu cumpostu cù l'ausiliariu « esse ».